

# 36 penuntut UTHM sertai Kufast

JOHOR BAHRU 22 Jun – Seramai 36 penuntut Universiti Tun Hussein Onn Malaysia (UTHM) mengikuti Kursus Fasilitator (Kufast) di Tiram Indah Village Resort, Ulu Tiram dekat sini baru-baru ini.

Penolong Pendaftar Pejabat Hal Ehwal Pelajar, Ahmad Khirul Nizam Ali, 31, berkata, kursus dua hari itu bertujuan untuk menyatukan peserta di samping membantu mereka mempelajari pelbagai kemahiran baru dan sifat kepimpinan.

“Peserta terdiri daripada penuntut Tahun 1 dan 2. Kursus ini merupakan salah satu platform untuk mahasiswa berorganisasi, mengasah bakat kepimpinan, mengajar dan mengenali potensi diri,” katanya kepada *Utusan Malaysia* di sini.

Kursus anjuran Unit Latihan dan Kepim-

pinan Mahasiswa, Pejabat Hal Ehwal Pelajar dengan kerjasama Majlis Perwakilan Pelajar itu juga untuk mempertingkatkan kemahiran insaniah.

“Dengan mengikuti kursus ini para penuntut berkenaan akan dapat memahami tentang betapa pentingnya kemahiran fasilitator dalam membimbing mereka yang memerlukan,” katanya.

Program itu juga dapat membentuk keyakinan diri, komunikasi berkesan, memamerkan keterampilan diri dan beretika, katanya.

Ia juga mampu memperluas dan mengharumkan nama UTHM kerana mereka akan menjadi produk universiti yang berkemahiran tinggi.

Seorang fasilitator, Mazibah Mohd. Zain,

44, berkata, kaedah pembelajaran berkonsepkan *Experimental Learning* digunakan sepanjang kursus berkenaan.

Menurutnya, ia adalah kaedah pembelajaran yang efektif dan terkini yang menggabungkan teknik syarahan, simulasi, latihan berkumpulan, diskusi dan gerak kerja.

“Penekanan diberikan dari aspek pembangunan diri dan pementapan sendiri, pengertian fasilitator, kecerdasan emosi, kemahiran berkomunikasi dan sebagainya,” katanya.

Selain itu, para peserta juga diminta membentangkan kertas kerja hasil perbincangan antara ahli kumpulan pada akhir program yang secara tidak langsung dapat membina keyakinan diri untuk membuat pengucapan awam di khalayak ramai.



SEBAHAGIAN peserta kursus fasilitator di Tiram Indah Village Resort, Ulu Tiram, Johor Bahru, baru-baru ini.